

Բնրանք յայտնեցին մի քանի անուններ, իսկ Մարիամը աւելացրուց.

– Գիտե՞ս, Ֆարիատ, Սօնան էլ եկել է մեզ հետ. նրա հայրն էլ, եղբայրն էլ եկել են: Հիմա ի՞նչ կ'ասի, երբ որ տերտերը քեզ կտեսնէ:

– Ինչ պէտք է ասի, – պատասխանեց Մագթաղը ծիծաղելով: – Կրննէ ականջներիցը ձիգ կը տայ ու կասէ՝ Ֆարիատ, ինչո՞ւ փախար վարժարանից:

– Նա չէ կարող, հիմա ես նրա ականջներից ձիգ կը տամ, – պատասխանեցի ես:

– Վա՛յ, մեղք չէ՞, ախար նա տերտեր է :

– Ֆարիատը հանաք է անում, – խօսեց Մարիամը:

– Սօնան գիտե՞, որ այստեղ եմ, – հարցրի ես:

– Նա չէ իմանում, նա այսօր առաւօտեան ինձ ասում էր՝ «երնէ՛կ Ֆարիատն այստեղ լիներ» – Նա շատ ուզում էր քեզ տեսնել: Ինչո՞ւ էր ուզում, Ֆարիատ, – հարցրուց Մարիամը:

– Չեմ իմանում... Բայց որտե՞ղ են վեր եկել նրանք:

- Չտեսա՞ր դու, նրանց չադրը կպած էր մերին: Նրանք էլ քեզ չտեսան, չեմ իմանում, ուր էին գնացել, այնտեղ չէին, – ասաց Մարիամը:

Քոյրերս պատմեցին մեր քաղաքից մի քանի նորութիւններ, որոնց թւում յայտնեցին եւ վարժապետիս կնոջ՝ ողորմելի Գիւլ-ջիանի մահը: Ես մի կողմից ուրախացայ, որ խեղճ կինը ազատոեցաւ իր տանջանքներից, որով չարչարւում էր նա այնքան շատ տարիներ, խիստ հազիւ բաժանելով հիւանդութեան մահճից: Բայց ինձ վրայ խիստ տխուր տպաւորութիւն գործեց, երբ Մագթաղը ասաց, թէ մեր քաղաքում այնպէս լուր էր տարածուել, իբր թէ տերտերակնոջ մահուան պատճառն եղել է տեր հօր սաստիկ ծեծը, որին արժանացրել էր քահանան իր կնոջը նրա մահուանց մի քանի օր առաջ: Ես առանց երկբայութեան հաւատացի, մտաբերելով, թէ որպէ՞ս բարբարոսաբար ծեծում էր նա ինձ եւ իմ ընկերներին: Եւ մի այսպիսի մարդը, որպէս վարժապետ եւ քահանայ, առաջնորդում էր մի ամբողջ քաղաքի ուխտաւորներին դէպի աստուծոյ մօր տաճարի երկրպագութիւնը...

Որպէս իմացայ քոյրերիցս, տեր Թողիկը, բացի Սօնայից, բերել էր իր հետ եւ իր որդի Ստեփանին: Խեղճ տղայի խեչացնորութիւնը, վերջին օրերում աւելի սաստկացած լինելով, հայրը բերել էր նրան սուրբ աստուածածնի վանքը այն մտքով, որ թողնէ Ստեփանին մնալու վանքի «խեղճերի» մէջ, այնտեղ բժշկուելու համար: Նա այժմ համարում էր Ստեփանի խելացնորու-